

पं ग वा डी मा सि क
प त्रि का

तुबारि

जरुत - नौकरी - जरुत
नौकरी जे यक लिखो पढो मेहणु लौता
जे सोच कइ कुछ लिख सकता
✪ खरी तनखा मेति ✪
सुआ जानकारी जे ☎ 9418721336

तुबारि संपादकीय टीम

◆अस इ उम्मिद करं
लगो से कि एण बाड़े दिन
अन्तर सुआ मेहणु इस
कम अन्तर सहयोग कते।

◆इस तुबारि मासिक पत्रिका
समाचार पत्र एकट अन्तर
रिजिष्ट्रि नेई भो। सिर्फ पांगि
घाटि अन्तर पढ़ू जे इ पत्रिका
शुरु कियो सि।

◆तुबारि यक अवाणिज्यिक
पत्रिका भो।

◆तुबारि पत्रिका कोइ मेहणु,
जनजाति, त संस्कृति गलित
कद्वेण जे नेई छपाण लगे।
अगर कोइ ई सोचता बि त
अस जिम्मेवार नेई।

◆छपाणे पेहले सोभ आर्टिकल
दुई टाई पांगेई मेहणु हरालो
असे। इ त खुलि बोक असि
कि पेहिल बार पांगवाडि
लिखणे सुआ मुशकिल भुन्ति
त गलति बि भुन्ति। अगर
कोइ लिखणे गलति असि त
असि जे जरूर बोले। त अस
तसे होरे संस्करण पुठ ठीक
करणे कोशिश कते।

◆आर्टिकल्स ना मिलए, या
घाटि मेहणु के मदद ना
मिलए त तुबारि पत्रिका कदि
बि बंद भुई सकता।

◆कोइ चिज छपां सि या नेई
छपां जे तुबारि संपादकीय
टीमे पुरा अधिकार असा।

◆अस सोभि पांगि मेहणु जे
हात जोड कई निवेदन कते
कि, तुस बि कोइ अछा
अर्टिकल, पुराणि या नौइ
कथा, कहावत, कविता, त
नौवे धीत (पांगवाडी अन्तर)
लिख कइ छपां जे हेंचदे दिए।

◆अस किलाड केन्द्रीय
पुस्तकालय, त बजार राखे
ठेके भैड हरिरामे दुकान
अन्तर तुबारि ड्रॉप बॉक्स पुठ
बि अपु सझाव ओर अर्टिकल्स
रखुं जे सुविधा कियो असि।

☎ 9418431531

☎ 9418429574

☎ 9418329200

☎ 9418411199

☎ 9418411599

तुबारि संपादकीय टीम कनारा सोबि तुबारि
पढ़ बाड़ि जे नौआ साले-2012 बधे!

लिखित पंगवाडी भाषा : यक शुरुवात त तसे इतिहास

जुलाई 2006 अन्तर विनय त धनुंजय भाषाविद् *Linguist* पेहलि बार पांगी घाटि ए। अस तपल भाषाविद् हिसाब जुए ओ थिए। हें लक्ष्य इ थिया कि अस पंगवाडी लिख कइ भाषा सुहिलयत करं जे लोकल मेहणु के मदद कते। मेहणु जपल पुछतेथ कि अस कोउं भिन्थ त अस कि कम कते, त हें जवाब थिया कि अस भाषाविद् भिन्थ त असी जे भाषा लुखो नेई तेस भाषा लिख कइ सुहिलयत करं जे मदद कते। जपल असी बोलु कि अस 'रिसर्च' कते त सुआ मेहणु इ समझे कि अस Ph.D करं लगे असे। त से होरे मेहणु जे बि ती बोलुं लगे। ती भोई कइ सुआ मेहणु असी Ph.D बोलि पेहछाण लग गे। जपल अस तुबारि - पंगवाडी मासिक पत्रिका छपाण लगे त सुआ मेहणु एसे सुसुर मतलब ना समझ बटे। अस इ हरालुं चाहतेथ कि पंगवाडी भाषा अन्तर बि किताब, पत्रिका त होरे छपाणे चिज बण सकती।

असी पंगेई एई कइ पंज साल भोई गो असे। इस बुछ असी पंगवाडी भाषाएं वर्णमाला त व्याकरण पुठ, त पंगवाडी कथा पुठ लेख लिखो असे। किस कि से सोब अंग्रेजी अन्तर (*phonetics*) लिखो असे। तस सुआ मेहणु न समझ सकते, त इस फुलियाठ बुछ, अस पंगवाडी वर्णमाला त व्याकरणे पुठ हिन्दी अन्तर किताब बणो असी। ए किताब सिर्फ चेक करं जे त अगले साल सुसुर छपाण जे ब्योरा कियो असे। इ सोब कम सिर्फ पंगवाडी भाषा सुहिलयत करं जे असे ना कि Ph.D जे लगे असे। हां, इ जरूर असु कि अस अपु लेख जपल कोई विश्व विद्यालय पुठ दी कई दुई साल पढते त तपल Ph.D डीग्री मी सकती। पर अभेई तकर अस कोई विश्व विद्यालय पुठ Ph.D एडमिशन निओरी नेई। पर असी भाषा-विज्ञान (*Linguistics*) पढो असा त यक भाषा विकास त साक्षरता प्रोजेक्ट (*Language development and literacy project*) नाउं, NGO जुए मी कइ कम कते जे कि भाषा सुहिलयत अन्तर कम कते। अब जीं हें कम बहुं लगे असु त अस बि तत टेम देण नेइ लगे। हें NGO बि असी होरे-होरे कम देन्ति। त अब इ जरूरी भुण लगे असु कि इठियाणि मेहणु इ अपु भाषा सुहिलयत कइ सकते।

कउं जीतता

यक दाँदु दुई कुतर पड़ो भुन्ता। त यक रोज तसे पोउतुर हेरता की दुहिए कुतर एकेकि दन्तियाण लगे भुन्ते। त से तेन्हि लेउडे बइ दौडान्ता। पर तसे मन अन्तर यक सवाल एन्ता। से अपु दाँदु केआं घेन्ता त बोता, "दाँदुआ, मोउ कुछ पुछुण असु"। से बोता "पुछ"। त पोउतुर बोता, "अगिर, हें दुहिए कुतर दन्तियाण लगे थिए। अउं ई सोचुण लगे थिआ कि अगर ए दुहिए झगडिन्ते त कोउं जीतता"?

दाँदु अपु पोउतुर हेरता। धिक सोच कइ बोता कि "जेस कुतर अउं सुसुर खिलान्ता, से कुतर जीतता"। पोतुर बोता "हां, जेस सुसुर खांजे मेतु से जरूर मस्तिता त जीतता बि"। पता दाँदु बोता, "पोउतुर, हें मन अन्तर बि दुई कुतर भुन्ते। यक खरा त होरा खोटा (गन्दा)। जे खरा सा से हमेशा अब्बुल सोचता, त खरा खरा कम कता। ओर जे खोटा (गन्दा) भुन्ता से हर टेम कुस्तुरु सोचता त कम बि कुस्तुरु कता। अगर, तु अपु मन अन्तर जे खरा कुतर असा तेस सुसुर खिलान्ता त से जीतता। ओर, तु खरा मेहणु बणता। अगर, तु अपु मन अन्तर जे गन्दा कुतर असा तेस खिलान्ता रेहन्ता त से जीतता। तु हउ, बुरा मेहणु बणता।



- मगिरि हतोउ लई बिशुं – परेशानी में होना।
- गुदिर गा – मरना (नीचे मनभाव से बोलना)
- पेटे भारि भुण – गर्भधारण करना। (में जुएलि पेटे भारि असि।)
- मुंह बाड़ देण – मजे को खराब करना।
- अपु से अन्हारे बि केण – अपने लोगो को दुर से भी पहचानना।
- चौड़ा भुण – गुस्से में आना। (तु त तपल बड़ा चौड़ा भोई गा।)
- जीं उधार भारो सु – नाप -तोल कर देना। (कोई चीज पूरी भर के देना)
- हातउ टुठ घेंण – आदत हो जाना (टाईप करुं जे तें हातउ टुठ गोसे)
- ढिएड़ी केउ भूण – अनजान होना (मुंह बइ खान्तु त पुंछिड़ बइ ना कतु।)
- शीते बुढी टान्क – बार बार आराम करना।
- हतोउ आले लगुं – चिन्तित होना। फिक्र होना। (तें हतोउ आले किस लगो से?)
- बथ न केण – जलदी से चलना।

कुछ खास खबर

- ◆ लाहौल घाटी अन्तर घेपन राजा बाहर निसो असा। 6 जनवरी 2012 वापस मन्दिर घेई घेण असा।
- ◆ एऊंश पूरे पांगेई स्कूले पेपर दिसम्बरे बदले फरवरी-मार्च अन्तर भूण लगो असे।
- ◆ भारत साक्षर मिशन-2012 तहत सोभी पंचायती अंतर पढाई जोर-शोर पठ भुण लगो असी।
- ◆ पांगेई सोभी पंचायती के खास ग्रां सभा बैठक 1-1-2012 भुई गई।

यक जिल्हाणु डाक्टर जे बजन घटाणे दवाई मांगति त

By Shamma Singh



ADVERTISEMENT/ BEST WISHES FOR MARRIAGES, BIRTHDAYS, RETIREMENTS Etc. Please ☎ 9418429574

पंगवाड़ी लेखक प्रतियोगिता

तुबारि संपादकीय टीम, लेखक प्रतियोगिता करणे कियो असि। त कोइ बि मेहणु सिर्फ पंगवाड़ी (किलाड़े बोली या साचे बोली) अन्तर कथा * त लेख लिख कइ 2012 फरवरी 29 तक किलाड़ राजकीय पुस्तकालय (महातम जे) या किलाड़ बजार अंग्रेजी ठेके भैड़ हरी रामे दुकान पुठ दी सकते। लेख अन्तर अपु नांउ, ग्रांए नांउ त फोन नंबर लिखुं बिसरीं। हें निर्णायक कमेटी सोबि केआं बढिआ लेख चुणते। से लेख लिखु बाड़ि जे तुबारि संपादकीय टीम कनारा 500 रुपेइ ईनाम मेति त तसे फोटो त लेख तुबारि पुठ बि छपति।

पेहला ईनाम 500

* मिन्धल माता, टटण माता, शीतला माता त नाग देवता कथा छड दी कइ कोइ बि कथा लिख सकते।